

DEKRETUA
0548/2024

Euskara eta Kirol arloko zinegotzi delegatuak gidabaimena lortzeko azterketa teorikoa euskaraz egin eta gainditu duten udalerriko gazteentzako 2024ko deialdia onartzeko agindua eman du

AURREKARIAK

LEHENA.- Udal kontu-hartzailetzaren izapidean, dirulaguntza deialdi honetarako aurrekontu-kreditu nahikoa dagoela adierazten da (RC 220240000540- Esp. zk: 10EUSK-2023/0038).

BIGARRENA.- Dirulaguntzak arautzeko onartu duen araudi berriarekin Udalak marko juridikoa eta aintzat hartuko dituen irizpideak ezarri nahi izan ditu.

OINARRI JURIDIKOAK

LEHENA.- Abenduaren 17ko 38/2003 Legea, Dirulaguntzen Orokorra, uztailaren 21eko 887/2006 Errege Dekretua, 38/2003 Legearen gaineko Araudia onartzen duena.

BIGARRENA.- Erandioko Udalaren dirulaguntzak ematea arautzen duen Ordenantza orokorra, behin betiko onarpena 2024ko martxoaren 13an argitaratua, 52 zk.dun Bizkaiko Aldizkari Ofizialean.

HIRUGARRENA. Honako lege-xedapen hauetan ezarritakoa: 11/99 Legea, apirilaren 21ekoa, Toki Araubidearen Oinarriak arautzen dituen apirilaren 2ko 7/85 Legea aldarazten duena, 781/86 Errege Dekretua, apirilaren 18koa eta 39/2015 Legea, urriaren 1ekoa, Administrazio Publikoen Administrazio Prozedura Erkidearena (Artikuluak: 114.1, 123 eta 124).

HONAKO HAU XEDATZEN DUT:

LEHENA.- Epe bakarreko lehiaketa bidezko prozedurari jarraituz, gidabaimena lortzeko azterketa teorikoa, 2023ko irailetik 2024ko abuztura bitartean, euskaraz egin eta gainditu duten udalerriko gazteei zuzendutako dirulaguntza deialdia onartzea.

BIGARRENA.- DIRULAGUNTZAREN GAIA.

1. Dirulaguntza honen gaia da gidabaimena lortzeko probetara aurkezteko adina duten udalerriko gazteei probak euskaraz egitera animatzea, euskara izan baita, gehienen kasuan, ohiko ikasketak egiteko erabili izan duten hizkuntza.

HIRUGARRENA.- ONURADUNAK.

Eskatzaileak, Erandion erroldatutako 17 eta 23 urte bitarteko gazteak izango dira, gidabaimena ateratzeko azterketa euskaraz egin dutenak.

LAUGARRENA.- DIRULAGUNTZAK EMATEKO ARAUBIDEA

Erandioko Udalaren Aurrekontuko ondorengo diru-partidetan erabilgarri diren kredituei egotziko zaizkie dirulaguntza hauek:

- 35-3352-48010 diru-partida.- Udalaren aurrekontuetatik 1.200,00 €, gehienez ere

Aurrekontuetako kredituetan soberakinik izanez gero, hau da, baldin eta hasieran aurreikusitako gastua baino txikiagoa bada dirulaguntza eskarien zenbatekoa, kreditu soberakinen transferentzia egitea erabaki daiteke eta gehieneko beste zenbatekoak handitu, beste deialdi bat egin behar izan barik. Era berean, aurrekontuko kredituen zenbatekoa handitu egin daiteke kredituak gehitze, gaitze edo sartzearen ondorioz. Arestian ezarritako hori gauzatzeko ezinbesteko baldintza izango da aurrekontuetan kreditu nahikoa egotea eta, bidezkoa izanez gero, dirulaguntza emateko erabakia hartu aurretik aurrekontuari dagokion kreditu aldaketa onartzea.

Edozelan ere, eskaera guztiei erantzuteko aurreikusitako diru-partida nahikoa ez balitz, eskatzaile guztien artean hainbanaketa egingo da.

BOSGARRENA.- ESKABIDEAK

Dirulaguntza eskaera egiteko honako dokumentu hauek aurkeztu beharko dira:

- Eskaera-orria, behar bezala beteta.
- Nortasun Agiria.
- Herriko autoeskola laguntzaileren batean matrikula ordaindu izanaren egiaztagiria.
- Trafiko Zuzendaritzaren agiria, edo bestelakoren bat, azterketa euskaraz egin dela ziurtatzen duena.

SEIGARRENA.- DIRULAGUNTZAK ESKATZEKO EPEAK ETA LEKUAK

Beharrezko dokumentazioa erantsi eta gero, dirulaguntza eskabidea aurkeztu ahal izango da 2024ko irailaren 4ko 14:00ak arte.

Eskabideak leku hauetan aurkez daitezke, edo, bestela, lege ezarritako bestelako edozein bide erabilita (39/2015 Legea, Administrazio Publikoen Administrazio Prozedura Erkidearena, 16. artikulua):

- Herriarren Arreta Zerbitzuaren bulegoan, Astrabuduan edo Altzagan (Meso 20 eta Antonio Trueba zeharkalea 2)

ZAZPIGARRENA.- DIRULAGUNTZEN ZENBATEKOA

Dirulaguntza matrikula ordaintzeko izango da eta hor ez dira azterketa tasak sartuko.

Dirulaguntzatarako mugak hurrengoak izango dira:

- Eskatzaile bakoitzak, gehienez, matrikula gastuaren %80 jaso ahal izango du azterketa teorikoa euskaraz egiteagatik, eta inoiz ere ez 200 euro baino gehiago.

- Azterketa teorikoa euskaraz egiteko dirulaguntza behin bakarrik jaso ahal izango da.

ZORTZIGARRENA.- BIDERATZEA ETA EBAZTEA

a) Erandioko Udalaren dirulaguntzak arautzen dituen ordenantza orokorraren arabera (BAO, 52.zk. 2024, martxoak 13), dagokion saileko instrukzio-organoak prozeduraren instrukzioa egingo du: datuak egiaztatu eta eskaerak ebaluatu.

b) Eskaerak ebaluatu ostean, ondorengo kideek osatutako organoak dirulaguntzak bideratzeko txostena eta ebazpen proposamena egingo ditu.

- Batzorde burua: arloko zinegotzi-delegatua
- Batzordekidea: arloko teknikaria
- Idazkaria: arloko administraria

c) Alkatetza da dirulaguntzak ebazteko aginpidea duen organoa.

Dirulaguntzaren emakidari buruzko ebazpena pertsona onuradunei jakinaraziko zaie behar bezala arrazoituta eta gehienez ere HILABETEKO epean, betiere eskabideak eta dokumentazioa emateko ezarritako epea amaitzen denetik zenbatzen hasita.

Erandioko udalak eskubide izango du eskatzaile bakoitzak emandako edozein datu beste administrazio publikoekin eratzeko, beti ere deialdi honen xede den gaiari atxikita.

BEDERATZIGARRENA.- JAKINARAZPENA ETA ARGITARA EMATEA

Ebazpena emanda, pertsona edo erakunde onuradunei jakinarazi beharko zaie Herri Administrazioetako Araubide Juridikoari eta Administrazio Prozedura Erkideari buruzko 30/1992 Legearen 58. artikuluan eta hurrengoetan ezarritakoaren arabera.

Erandioko Udalak dirulaguntzak eman ahal izateko, emakidaren azalpena eman beharko du udaleko iragarki taulan, eta Bizkaiko Aldizkari Ofizialean argitaratu beharko du ebazpenaren laburpen bat, eduki osoa jendaurrean zein tokitan dagoen adieraziz; hori guztia udaleko euskara zerbitzuaren web-orrian ere emango da argitara.

Ebazpenaren jakinarazpena aurreikusitako epe-mugan jasotzen ez bada, onuradunek ulertu ahal izango dute beren eskabidea gaitzetsia izan dela, Herri Administrazioen Araubide Juridikoaren eta Administrazio Prozedura Erkidearen Legearen 44. artikuluan zehaztutakoaren ondorioz.

HAMARGARRENA.- DIRULAGUNTZAREN ORDAINKETA

1. Dirulaguntza eman zaiola adierazten duen jakinarazpena jaso eta ondorengo hamar egun baliodunetan onuradunak ez badio beren beregi eta idatziz uko egiten dirulaguntzari, onartu egin duela ulertuko da.

Dirulaguntza emango dela jakinarazi ondoren, 10 egun igaro eta berehala, Udalak bakoitzari dagokion zenbatekoaren ordainketa izapidetuko du.

2. Dirulaguntza ordaindu baino lehen, onuradunek zerga-betebeharrak eta Gizarte Segurantzarekikoak egunean dituztela egiaztatuko da. Egiaztapena egin ondoren ikusten bada onuradunetako batek betebeharrak horietako edozein ez duela betetzen, errekerimendua egingo zaio hamar (10) eguneko epean egoera hori erregulariza dezan, eta ohartaraziko zaio, horrela egiten ez badu, emandako dirulaguntza jasotzeko eskubidea galduko duela.

3. Dirulaguntzaren ordainketa ez da egingo honako kasuetan:

- a) Onuradunak zerga zorrak egunean ez dituenen.
- b) Itzulketa egiteko ebazpena dela-eta zorduna denean.

HAMAIKAGARRENA.- DIRULAGUNTZEN ITZULKETAK

Diru laguntzen emakida Herri Administrazioetako Araubide Juridikoari eta Administrazio Prozedura Erkideari buruzko 30/1992 Legearen 62. eta 63. artikuluek jasotako baliogabetasun edo deuseztagarritasun akatsetariko batean sartzen den kasuak gorabehera, jasotako kopuruak itzuli eta legezko berandutza interesa eskatu ahal izango da honako kasu hauetan:

- a) Dirulaguntza lortzea horretarako eskatutako baldintzak faltsutuz edo diru laguntza ematen utziko ez luketen baldintzak ezkutatuz.
- b) Dirulaguntzaren emakida arrazoitzen duten xedea, jarduera, proiektua edo jokabidea zatiz edo osorik bete ez izana.
Ez-betetzea zatizkoa bada eta betetze osotik hurbil badago, itzuli beharreko diru kopurua ez-betetzearen neurrikoa izango da.
- c) Dirulaguntzaren erregulazio arauetan ezarritakoaren arabera, justifikazio betebeharra ez betetzea edo behar bezala ez betetzea.
- d) Finantza egiaztapen eta kontrol jardueri aurre egitea, alde batera uztea, oztopatzea edo uko egitea eta kontu betebeharrak edo agiriak gordetzeko betebeharrak ez betetzea, baldin eta horren ondorioz ezin bada fondoei emandako erabilera egiaztatu, ezin bada diruz lagundutako jardueren xedea, errealitatea eta maiztasuna ziurtatu edo ezin bada frogatu ea administrazioetatik edo erakunde publiko edo pribatuetatik (nazio mailakoak, Europar Batasunekoak edo nazioarteko erakundeetakoak) xede berarako emandako diru laguntzen, laguntzen, sarreren edo baliabideen konkurrentzia egon den ala ez
- e) Gehiegizko finantzazioa benetako kostuaren aldean; gehiegizko zati hori, beraz, itzuli behar izango da.
- f) Pertsona edo erakunde onuradunei ezarritako betebeharrak ez betetzea edo diru laguntza ematean hartutako konpromisoak ez konplitzea, baldin eta diru laguntzaren emakida arrazoitzen duten helburuak lortzeko, jarduera egiteko, proiektua gauzatzeko edota izan beharreko jokabidea hartzeko moduari eta epeari eragiten badiete.

HAMABIGARRENA.- ITZULKETA ESPEDIENTEA

Itzuli beharreko kopuruak zuzenbide publikoko sarrera izaera dauka; horrek berekin dakar Bizkaiko Lurralde Historikoko Toki Erakundearen Aurrekontuari buruzko abenduaren 2ko 10/2003

Foru Araua aplikagarria izatea, bai eta Erandioko Udalaren kudeaketa, diru bilketa eta ikuskapenari buruzko ordenantza ere.

Edozein kasutan ere, prozedura izapidetzean onuradunak entzuna izateko daukan eskubidea bermatuko da, bai eta bere jarduketa defendatzeko bidezko alegazioak egiteko eskubidea ere.

Itzulketa eskatzen duen ebazpena diru laguntza eman zuen organo berberak emango du; horretarako, eskaera horren justifikazioa egingo du eta itzuli beharreko kopurua zehaztuko du, bai eta sarrerarako borondatezko epea ere. Halaber, ohartaraziko du, itzulketa epe horren barruan egin ezean, premiamendu bideari ekingo zaiola.

HAMAHIRUGARRENA.- Era berean, deialdi honi behar besteko hedapena emateko Bizkaiko Aldizkari Ofizialean eta euskara zerbitzuaren web orrian argitaratu beharko da.

HAMALAU GARRENA.- Ebazpen hau ondokoei jakinaraztea bidezko diren ondorioak izan ditzan: Ogasun sailari eta hizkuntza normalkuntzari. Era berean, Idazkaritza sailari ere jakinaraziko zaio, kontu hartu eta alkateak zein korporazioko kide eskuordetuek emandako Ebazpenen Liburuan jasota gera dadin.

Alkateak hala dekretatu eta izenpetu du.

Erandio, 2024ko martxoaren 15a

Kontu hartu dut
Martxoaren 16ko 128/2018 Errege
Dekretuaren 3.2 e) artikulua betez

Alkatea
Aitziber Oliban Gutiérrez

Behin-behineko idazkaria
Javier Basante Otegi